

<><><><><><>

Headlines

1. जम्मू-कश्मीर च होए दे द'ऊं बक्ख-बक्ख टाक्करें च सुरक्षाबलें आसेआ 3 आतंकवादिएं दा सफाया कीता गेआ ऐ।
2. भारती अंतरिक्ष अनुसंधान संगठन – इसरो नै लद्दाख च चंद्रमा सरबंधी मिशन दिएं आजमाईशें लेई लद्दाख च भारत दा पैह्ला एनालॉग अंतरिक्ष मिशन शुरू कीता ऐ।
3. उपमुख्यमंत्री सुरिंदर चौधरी होरें झिड़ी मेले दिएं तैयारिं दा जायजा लैता। उनें करसानें दे कल्याण बक्खी ध्यान केन्द्रित करने दी जरूरतै पर जोर पाया ऐ।
4. टिक्के दा ध्यार अज्ज समूलचे भारत च धूमधाम कन्नै मनाया जा करदा ऐ। केन्द्री गृह मंत्री अमित शाह होरें सब्बनें गी टिक्के दे ध्यार दिआं ममारखां दित्तिआं न।

<><><><><><>

Encounter

घाटी च कल होए दे द'ऊं बक्ख-बक्ख बटाक्करें च सुरक्षाबलें दी सांझी टीमैं त्रै आतंकवादिएं गी मारी मुकाया ऐ। सरबंधत इलाकें च आतंकवादिएं दी मजूदगी बारै पक्की सूह थोने परैन्त सुरक्षाबलें आसेआ उत्थे घेराबंदी ते तपाशी अभियान चलाये गे जेह्ङे मगरा टाक्करें च तब्दील होई गे। आकाशवाणी खबरें कन्नै गल्लबात करदे होई कश्मीर ज़ोन दे आईजीपी वी.के. बिरदी होरें इस गल्लै दी तसदीक कीती ऐ जे मारे गेदे आतंकवादिएं चा इक लश्करे तैयबा गुट दा सिरे दा कमांडर उसमान उर्फ छोटा वलीद हा। उसी श्रीनगर दे खान्यार इलाके च इक टाक्करे दरान सुरक्षाबलें मारी-मुकाया। मारे गेदा एह पाकिस्तानी आतंकवादो कश्मीर घाटी च लम्मे समैं थमां सरगर्म हा ते इन्नै केई वारदातें गी अंजाम दित्ते दा हा। अभियान दरान जम्मू-कश्मीर पुलस ते सीआरपीएफ दे चार जवान जख्मीं बी होए न। आईजीपी होरें इब्बी दस्सेआ जे दक्खनी कश्मीर दे अनंतनाग जिले दे लारनू कुकरनाग इलाके च कल होए दे टाक्करे च सुरक्षाबलें दौं आतंकवादिएं गी ढेर करी दित्ता। तोआई सुरक्षाबलें आसेआ उत्तरी कश्मीर दे बांडीपोरा दे पन्नार इलाके च बी किश संदिग्ध नक्लोहरकत दिक्खी गई। आतंकवादिएं गी चुनौती देने पर उनें सुरक्षाबलें दी टीम पर अन्नेबाह् गोलीबारी कीती ते घने जंगलें च जाई नस्से। सुरक्षाबलें उंदे धरफगड़ लेई बड़डे स्तर पर तपाशी अभियान चलाए दा ऐ।

<><><><><><>

ISRO Ladakh

भारतीय अंतरिक्ष अनुसंधान संगठन इसरो नै कल भारत दे पैहले अनालॉग स्पेस मिशन दी शुरुआत दी घोशणा कीती। लद्दाख केन्द्र शासित प्रदेश दे लेह च शुरू कीता गेदा एह मिशन भारत दा पैहला अनालॉग स्पेस मिशन ऐ। धरती पर गै अंतरिक्ष आंगर दा माहौल तैआर करियै इतिहास रचने दी इस कामयाबी कन्नै गगनयान मिशन ते मंगल ग्रह पर भेजने ते मुख्यै दा अपना अंतरिक्ष स्टेशन बनाने दे महत्वाकांक्षी मिशन च बी मदद थहोग। इस अभियान गी आका स्पेस स्टूडियो लद्दाख युनिवर्सिटी ते आई.आई.टी बाम्बे कन्नै मिलियै विकसित कीता गेआ ऐ। इसरो नै अपने सोशल मीडिया प्लैटफार्म “एक्स” पर लिखेया ऐ ते भारत दा पैहला अनालॉग अंतरिक्ष मिशन लेह च शुरू होआ।

<><><><><><>

EPFO

उपमुख्यमंत्री सुरिन्द्र कुमार चौधरी होरें कल आखेआ जे करसानें गी पूरा मान-सम्मान दिंदे होई अस बाबा जित्तो हुंदी विरासत, संघर्ष ते संदेश दा बी अनुसरण करने आं जिने करसानें दे अधिकारें दी खातर अपनी जिंदू तगर दा बलिदान देई दित्ता हा। एह गल्ल उपमुख्यमंत्री होरें कल औंदी झिड़ी दे मेले दिएं तैआरिएं दा जायजा लैने लेई लोआई गेदी इक बैठका च आखी। एह मेला 14 नवम्बर कोला 24 नवम्बर तोड़ी चलोग जेह्दे च ऐकती कोई 20 लक्ख लोकें दे शिरकत करने दी मेद ऐ। मेले च श्रद्धा ते मनोरंजन दे कन्नो कन्नी करसानें दी जागरूकता लेई कीते जाने आले प्रबंधें गी बी दिखेआ जाई सकदा ऐ। उपमुख्यमंत्री होरें आखेआ जे एह मेला शड़ा मकामी करसानें लेई नेई सगुआं जम्मू दी सांस्कृतिक विरासत गी उजागर करने दा बी इक मौका ऐ। उनें मेले च औने आले लोकें टकोहदा करियै करसानें गी इस दरान उंदी भलाई बेह्तरी लेई शुरू कीती गेदिएं स्कीमें दे बारे च बी जानकारी देने पर जोर दित्ता।

<><><><><><>

DGPC Dy CM

जिला गुरुद्वारा प्रबंधक कमेटी जम्मू दा इक शिष्टमंडल अपने प्रधान सरदार रंजीत सिंह टोहरा हुंदी अगुवाई च कल उपमुख्यमंत्री सुरिन्द्र कुमार चौधरी होरें गी मिलेया ते उनेंगी जम्मू प्रांतै च सिक्ख समुदाय सरबंधी बक्ख-बक्ख मुद्दें बारे अवगत कराया। कमेटी नै मेद प्रगट कीती जे इस बैठक च पुट्टे गेदे मुद्दें जरूर हल कीते जांगन जिंदे नै सिक्ख समुदाय दे समाजी, आर्थिक, सांस्कृतिक, धार्मिक ते होर केई मुद्दें ते चिंताएं दा नबेड़ा होग। उपमुख्यमंत्री होरें उंदे मुद्दें गी धरोइयै सुनेआ ते उंदे पैहल दी बिनाह पर नबेड़े दा जकीन दोआया।

<><><><><><>

Ramban Milk(byte)

रामबन जिले च दुधै दी पैदावार बधाने लेई मैहकमा पशुपालन आस्सेआ केई हीलें कीते जा करदे न। एहदे लेई मैहकमे आस्सेआ केई कार्यक्रम बी शुरू कीते गेदे, जिंदे राएं दुधै दा उत्पादन बधाने दे कन्नो कन्नी पशुएं दी सेहत दिक्खभाल ते पर्यावरण दे अनुकूल माहोल जकीनी बनाने बक्खी बी पूरा ध्यान दितता जा'रदा ऐ। दुध किट्ठा करने लेई 4 आटोमैटिक युनिट बी लाए गेदे न ते 2 दा निर्माण कम्म अजें जारी ऐ। एहदे इलावा पशुपालकें गी जागरूक बनाने लेई केई कैपें दा सरिस्ता बी समें समें पर कीता जंदा ऐ। इस बारे साढ़े जिला संवाददाता अजयदीप सिंह कन्नै गल्ल करदे होई मुख् पशु अधिकारी डॉ. सुहेल काबूसा होरें दस्सेआ

<><><><><><>

CAPD

खुराक, सार्वजनिक बंढ बिक्री, उपभोक्ता मामले, ट्रांसपोर्ट, युवा सेवाएं ते खेड्डें सरबंधी मंत्री सतीश शर्मा होरें कल मैरा मादरिया दा व्यापक दौरा लाया जित्थें उनें शहीद नायब सूबेदार बंसी लाल सरकारी हाई स्कूल च लग्गे दे इक किट्ठै गी संबोधत कीता। इस मौके मंत्री होरें आखेआ जे जम्मू कश्मीर केन्द्र शासत प्रदेश दे सब्बने इलाकें दा सामा ते पूरा पराता विकास ते इत्थूं दे लोकें दी भलाई बेह्तरी, मजूदा सरकार दा मुख् उद्देश्य ऐ। दौरे दरान लोकें दे केई प्रतिनिधि मंडल बी मंत्री हुंदे नै मिले ते अपने मुद्दें मसले उंदे सामने रखे जिनेंगी धरोइयै सुनने परैंत मंत्री होरें केइएँ मौके पर गै नबेड़ा करने दे निर्देश जारी करी दित्ते ते लोकें गी जकीन दोआया जे उंदी हर जायज मंग गी पैहल दी बिनाह पर नबेड़ा जाग।

<><><><><><>

Bhai Dooj Updated

टिक्के दा ध्यार अज्ज समूलचे देसै च पूरी धार्मिक श्रद्धा ते जोश कन्नै मनाया जा करदा ऐ। देआली दे ध्यार दे दौं दिनें परैंत मनाए जाने आहले इस ध्यान दे कन्नै गै 5एं दिनें तगर चलने आहले ध्यारें दा सिलसिला बी खत्म होई जंदा ऐ। अज्जै दे ध्याड़े भैहनां अपने भ्राह्म दे मत्थे पर टिक्का लाइयै ओहदी लम्मी उमर दी कामना करदिआं न ते एहदे बदले च भ्राह्म बी अपनी भैहने दी राक्खी करने दा वचन दिंदे न। केन्द्री गृह मंत्री अमित शाह होरें देशवासियें गी टिक्के दे ध्यार दिआं न। शाह होरें आखेआ ऐ जे एह ध्यार हर कुसै दे जीवनै च हिरख-प्रेम, समर्पण ते निष्ठा दी भावनाएं दा संचार करै। जम्मू च बी टिक्के दा ध्यार पूरी धार्मिक श्रद्धा कन्नै मनाया जा करदा ऐ। किश महिलाएं इस मौके पर सुरक्षाबलें दे जवानें कन्नै एह ध्यार मनाया। इक महिला नै इस मौके आखेआ

सुरक्षाबलें दे इक जवान ने बी इस मौके पर आकाशवाणी खबरें कन्नै गल्ल करदे होई आखेआ

<><><><><><>

Indian Railways

धयारें दी रूतै गी दिक्खदे होई ते रेल जात्तरिएं दी सुविधा दे मददेनजर भारती रेलवे नै विशेष धयारी ट्रेनां चलाने दा फ़ैसला कीते दा ऐ। कल दिल्ली-एनसीआर थमां तकरीबन 20 धयारी विशेष रेलगडिडयां देसै दे बक्ख-बक्ख हिस्सें लेई रवाना होइयां। इंदे च दरभंगा, रांची, पटना, कटरा, मुजफ्फरपुर, बल्लिया, कामाख्या ते आजमगढ़ शामिल न।

<><><><><><>

Jal Shakti

जल शक्ति मैहकमे दे मंत्री जावेद अहमद राणा होरें कल जम्मू दे नगरोंटा स्थित पानी साफ करने आले सीतली फिल्ट्रेशन प्लांट दा दौरा ते इस संयंत्र दे कम्मकाज दा निरीक्षण कीता। दोरे दरान उनेंगी पानी साफ करने दी प्रक्रिया ते लोकें तगर पजाने दी बवस्था बारे जानकारी दित्ती गई। मंत्री होरें किरयानी तलाह आले ट्यूब वेल ते मरवाल च बने दे पानी दे ओवर हैड टैंक दा बी दौरा लाया। अपने दोरे दरान ओह केई मकामी लोकें कन्नै बी मिले ते पीने आले पानी दी सप्लाई बारे उंदे बचार ते त्रतिक्रियां हासल कीतियां। मंत्री होरें सरबंधत अफसरें गी बी निर्देश दित्ते जे ओ बकायदगी कन्नै बक्ख-बक्ख इलाकें दा दौरा करन तां जे लोकें दिएं पानी सरबंधी दिक्कतें गी तौले शा तौले दूर कीता जा।

<><><><><><>

Solar Roof Top

पीएम सूर्यघर योजना तैहत इमारतें दिएं छत्तें पर सौर उर्जा आहले संयंत्र स्थापित करने दे कम्मै गी बढ़ावा देने दे मकसद कन्नै जम्मू-कश्मीर बैंक नै कश्मीर च बिजली दी बंडड सरबंधी कारपोरेशन केपीडीसीएल कन्नै रलियै घरेलू उपभोक्ताएं गी 10 किलोवाट तगर दे सौर उर्जा संयंत्र लेई ब्याज ते गरंटी मुक्त दोआर देने दा फ़ैसला लैता ऐ। इक बड्डे फ़ैसले तैहत जम्मू-कश्मीर बैंक नै इस महत्वपूर्ण योजना तैहत पूरी लागत झल्लने सरबंधी दिशा-निर्देश जारी कीते न। इस गैह कन्नै मेद ऐ जे घरेलू उपभोक्ताएं गी इस योजना बक्खी आकर्षित करने च मदाद मिलोग। प्रवक्ता मुजब, केई सारे राश्ट्रीकृत बैंक जि'आं भारती स्टेट बैंक, पंजाब नेशनल बैंक ते कैनेरा बैंक बी इससै किस्मा दा दोआर-कर्जा देआ करदे न।

<><><><><><>

Indian Startup

स्टार्टअप्स सरबंधी भारती तंत्र नै मौजूदा ब'रे दे पैहले 10एं म्हीनें च 12 इशारिया 2 बिलियन डॉलरें दा आंकड़ा पार करी लैता ऐ। एह रकम ब'रे 2023 च जुटाई गेदी कुल रकम थमां बी मती ऐ। स्वदेशी स्टार्टअप्स नै अक्टूबर म्हीने च इक बिलियन डॉलरें दा आंकड़ा पार कीता ऐ। पिछले म्हीने, प्रधानमंत्री नरेंद्र मोदी हुंदी अध्यक्षता च केंद्री मंत्रिमंडल नै उभरदे अंतरिक्ष खेत्तर लेई इक हजार करोड़ रुपें दी रकम गी मंजूरी दित्ती ही। रास-पूंजी दे मौकें ते पैसे सरबंधी जरूरतें गी दिक्खदे होई इस रकम गी 150 शा 250 करोड़ रुपे हर ब'रे तगर बधाया जाई सकदा ऐ।

<><><><><><>